

**Palanivel Umum Pengganti Prakash Rao, Vell Pari  
Bernama  
Jan 3, 2015**

KUALA LUMPUR, 3 Jan (Bernama) -- Presiden MIC Datuk Seri G.Palanivel hari ini mengumumkan pelantikan Datuk Kumar Silambaram sebagai setiausaha agung parti itu bagi menggantikan A.Prakash Rao.

Dalam kenyataan melalui e-mel di sini hari ini, beliau juga mengumumkan bahawa Ramalingam Krishnamoorthy dilantik sebagai pengarah strategik MIC bagi menggantikan Datuk Seri Vell Paari, anak bekas presiden parti itu, Datuk Seri S.Samy Vellu, yang memilih Palanivel sebagai penggantinya.

Palanivel, yang juga Menteri Sumber Asli dan Alam Sekitar, bagaimanapun tidak menyatakan jawatan Kumar sebelum ini.

"Saya juga melantik tiga anggota baharu Jawatankuasa Kerja Pusat (CWC). Mereka ialah Karuppanan Malairaja (Pulau Pinang), Datuk Ganesan Subramaniam (Kedah) dan Ganesan Thankaveloo (Selangor).

"Mereka akan menggantikan Tan Sri K.S Nijhar, Datuk R. Ramanan dan Datuk K.S Balakrishnan," katanya.

Palanivel juga berkata Jawatankuasa Disiplin MIC kini dianggotai Karuppanan Malairaja sebagai pengerusi, Datuk Ganesan Subramaniam dan Datuk Randhir Singh.

"Kesemua pelantikan berkuat kuasa mulai hari ini dan saya telah mengeluarkan surat kepada semua mereka yang berkenaan dan mereka akan menerimanya nanti," katanya.

Sementara itu, panggilan telefon Bernama kepada Prakash Rao, tidak berjawab.

Prakash Rao digantikan hanya selepas hampir setahun dilantik menjadi setiausaha agung parti itu oleh Palanivel pada 16 Dis 2013.

Sebelum itu, A.Sakthivel, yang dilantik Palanivel sebagai setiausaha agung pada 14 Mei 2013, hanya menyandang jawatan itu selama tujuh bulan apabila beliau digantikan Prakash Rao.

Sebelum Sakthivel, jawatan itu disandang S. Murugesan selepas dilantik Palanivel, tetapi beliau berundur berikutan prestasi lemah MIC pada Pilihan Raya Umum Ke-13.

Sementara itu, Vell Paari dalam mesej melalui SMS kepada Bernama berkata kedudukannya sudah terbatal dan tidak sah disebabkan surat Pendaftar Pertubuhan (ROS) pada 5 Dis.

Vell Paari juga mengulas kenyataan Palanivel apabila Presiden MIC itu mengucapkan

terima kasih kepada beliau dan yang lain atas perkhidmatan diberi melalui jawatan yang disandang sebelum ini.

"Jelas (Palanivel) tidak boleh mengucapkan terima kasih kepada saya kerana saya telah mengkritik kepimpinan beliau," katanya.

ROS mengisytiharkan sebagai tidak sah pemilihan bagi tiga jawatan naib presiden dan 23 jawatan anggota CWC yang diadakan semasa perhimpunan agung parti di Melaka, November lepas.

Dalam surat bertarikh 5 Dis, ROS berkata pihaknya mengesyorkan supaya pemilihan semula diadakan bagi jawatan-jawatan itu dalam tempoh 90 hari berikutan dakwaan salah laku dan melanggar perlembagaan parti serta Akta Pertubuhan.

ROS menasihati MIC tidak mengadakan perhimpunan agung tahunannya sehingga isu itu diselesaikan.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1097803>